



22. august 2011

Inatsisartut Suleriaasianni § 37 naapertorlugu Naalakkersuisunut apeqqut imaattoq matumuuna saqqummiuppara:

Naalakkersuisunut apeqqut:

- 1. Suna pissutaava Kommune Kujalliup kommunimi meeqqat atuarfimmi nerisarnissaat pillugu saaffiginnissutit tullerriaat Namminersorlutik Oqartussanit akineqartarsimanninnerannut?**
- 2. Meeqqat atuarfimmi nerisarnissaannut ukiuni atuarfisuni 2009/10-mi aamma 2010/2011-mi tapiissutitut tunniunneqarpat aamma qinnuteqaatitut tiguneqareersut tunngavigalugit, ukiumi atuarfiusumi 2011/12-mi aningaasat qassit tapiissutigineqartariaqartussatut Naalakkersuisut taggippaat? Periarfissaqartillugu akissutit skematut ilusileqquneqarput.**
- 3. Namminersorlutik Oqartussat tamakkiisumik akiligaanik nuna tamakkerlugu atuarfinni nerisitsisarnissaq pillugu Naalakkersuisut sunik takorluugaqarpat aamma neristsisarnerit assigiinngitsut pillugit aaqqissuussinerit qanoq akeqartussatut Naalakkersuisunit nalilerneqarpat?**

A: Ullaakkorsiorneq (Issiigassat aamma assigisaat) neqeroorutigineqartassaaq atuarnerup aallartinnerani aamma ullup qeqqasiutissat taquatut agguanneqartassapput anitsiarfissuarmi.

B: Ulloq naallugu nerisassat taquat ullaarnganiit agguanneqartassapput.

C: Ullaakkorsiorneq (Issiigassat aamma assigisaat) neqeroorutigineqartassaaq atuarnerup aallartinnerani aamma kissartut ulloqeeqasiutit anitsiarfissuarmi.

- 4. Nuna tamakkerlugu atuarfinni nerisitsisarnissamut aaqqissuussinnginnissaq sunik iluaqutissartaqartutut Naalakkersuisut takorloorpaat?**

(Inatsisartunut ilaasortaq Andreas Uldum, Demokraatit)

Tunngavilersuut

Pitsaasumik, ilinniarfiusumik pissarsilluarfiusumillu atuartitsissagaanni meeqqap tunngaviusumik pisariaqartitai tunniunneqarsimasariaqarput. Taamaattumik pingaarluinnarpoq, meeqqap toqqissisimanartumik isumassuilluarfiusumillu angerlarsimaffeqarnissaa aammalu meeqqap



qaarsillarluni atuariartortarnissaa – aamma taama pingaartigaaq minnerpaamik ullormut ataasiarluni nerisaqartarnissaa.

Piviusuuvoq meeqqat tamarmik toqqissinartumik isumassuilluarfiunngitsumillu angerlarsimaffeqaanngimmata, nerisassaqarfiujuaannartumi. Aamma meeqqat tamarmik atuariartorneq ajorput qaarsillaqqallutik, taquarlutillu pitsaasunik peqqinnartunillu.

Demokraatini isumaqarpugut, kusanarluinnartuussasoq, inuiaqatigiit isumagippassuk, meeqqat atuartut ilikkagaqarluarnissaminnut periarfissaasa pitsaanerpaanersaat. Taamaattumik isumaqartuarpugut, atuarfimmi nerisitsisarneq nunami tamarmi atuuttariaqartoq tamakkiisumillu Namminersorlutik Oqarssanit aningaasalersorneqarluni. Taamaasiornikkut qulakkeerneqassaaq atuartut tamarmik assigiimmik pineqarnissaat.

Oqallinneq manna siusinnerusukkut pikkunartumik ingerlanikuuvoq. 2007-mi taamani inatsisartunut ilaasortaasoq Jens B. Frederiksen (Demokraatit) imaattumik siunnersuuteqarpoq:

Kalaallit Nunaanni atuarfinni tamani atuartut nerisinneqartalernissaannut naammattumik aningaasalerneqarnissaa qulakkeeqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Oqallittoqangaatsiarpoq ilaatigut KNR-imi, tassani ilinniarsimasut atuartut tamarmik atuarfimmi nerisinneqartalernissaat qujarulluinnarlugu tapersersorpaat. Ilinniartitsisoq Lone Kokholm ilaatigut ima oqarpoq:

”Ulluni naliginnarni atuartitsininni takusarpara, atuartut quliungaangata arfinillit ullaakkorsiorneq ajortut, atuariartunnginnerminni. Aamma taamaappoq ullup qeqqasioqarpoq eqqarsaatigalugu.

Atuartut iluatsitsilluinaqqissaarsimagunik 20 imaluunniit 30 koruuninik nassartarput sodavandisiutissaminnik, chipsisiutissaminnik, popcornisiutissaminnik imaluunniit arlaannik inuussutissakittunik pisiniutissaminnik. Taakku meerarpassuit ajorluinnartumi inissisimapput.

Ilikkagaqarnissaminnut periarfissaat annikittuaraavoq. Taamaattumik isumaqarpunga, atuarfinni nerisitsisarneq tamanut atuuttussanngorlugu eqqunneqartariaqartoq” (Tusarfik:

<http://knr.gl/kl/node/23693>).



Nuummi nakorsaaneq aamma Inuussutissat pillugit Isumalioqatigiinni ilaasortaq Gert Mulvad ima oqarpoq: ”Qularinngilluinnaqqissaarpara, atuarfinni nerisitsisarneq atuartunut tamanut atuuttariaqartoq. Tamatumunngalu atatillugu politikerit aamma isummerfigisariaqarpat meeqqat inuusuttullu naammattunik inuussutissartalinnik atuarfimmi sassaalliiffigineqartarnersut, tassa uanga nammineq kalaaliminernik nerisaqarnerunissaq illersorpara. Peqataasariaqarpugut peqqinnartunik nerisaqartarnissaannut meeqqat ilinniartissallugit. Taamaattumik immaqa isumassarsiatsialaasussaassagaluarpoq ilisserusiorluta eqqarsartalertuugutta anguniarlugu atuartut peqqinnartunik pissaganartunillu nerisitalernissaat. Matumani qissimissinnaavagut meeraaqqeriviit meeqqeriviillu meeqqanik nerisitsisalereernikuusut”

Tusarfik: <http://knr.gl/kl/node/23693>).

Demokraatini immikkut ilisimasallit marluk tusakkatta oqaasiinut isumaqataalluinnarpugut.

Apeqqutit akeqquneqarput nalignnaasumik piffissarititaasut ullut sulliviit qulit qaangiutsinnagit.